

摘藻堂四庫全書薈要

史部

欽定四庫全書薈要

史部
舊唐書卷五
六

詳校官內閣侍讀臣孫球



欽定四庫全書薈要卷四千九百十七

史部

舊唐書卷五

後晉司空同中書門下平章事劉 昫撰

本紀第五

高宗下

麟德三年春正月戊辰朔車駕至泰山頓是日親祀昊天上帝於封祀壇以高祖太宗配饗己巳帝昇山行封禪之禮庚午禪於社首祭皇地祇以太穆太皇太后文

德皇太后配饗皇后為亞獻越國大妃燕氏為終獻辛未御降禪壇壬申御朝壇受朝賀改麟德三年為乾封元年諸行從文武官及朝覲華戎岳牧致仕老人朝朔望者三品已上賜爵二等四品已下七品以上加階八品已下加一階勲一轉諸老人百歲已上版授下州刺史婦人郡君九十八十節級齊州給復一年半管嶽縣二年所歷之處無出今年租賦乾封元年正月五日已前大赦天下賜酺七日癸酉宴羣臣陳九部樂賜物有

差日昃而罷丙子皇太子弘設會丁丑以前恩薄普進
爵及階勲等男子賜古爵兗州界置紫雲仙鶴萬歲觀
封巒非煙重輪三寺天下諸州置觀寺一所丙戌發自
泰山甲午次曲阜縣幸孔子廟追贈太師增修祠宇以
少牢致祭其褒聖侯德倫子孫並免賦役二月己未次
亳州幸老君廟追號曰太上玄元皇帝創造祠堂其廟
置令丞各一員改谷陽縣為真源縣縣內宗姓特給復
一年夏四月甲辰車駕至自泰山先謁太廟而後入庾

寅改鑄乾封泉寶錢六月壬寅高麗莫離支蓋蘇文死
其子男生繼其父位為其弟男建所逐使其子獻誠詣
闕請降詔左驍衛大將軍契苾何力率兵以應接之秋
七月乙丑徙封殷王旭輪為豫王庚午左侍極檢校右
相嘉興子陸敦信緣老病乞辭機揆拜大司成兼知左
侍極大司憲兼檢校右中護劉仁軌兼右相檢校右中
護八月辛丑兼司元太常伯兼檢校左相鉅鹿男竇德
玄卒丁未殺司衛少卿武惟良淄州刺史武懷運仍改

姓蝮氏冬十月己酉命司空英國公勣為遼東道行軍大總管以伐高麗

二年春正月丁丑以去冬至于月無雨雪避正殿減膳親錄囚徒罷乾封錢復行開元通寶錢二月戊戌涪陵郡王愔薨辛丑改萬年宮依舊名九成宮夏六月乙卯西臺侍郎楊武西臺侍郎道國公檢校太子左中護戴至德正諫議大夫檢校東臺侍郎安平郡公李安期東臺侍郎張文瓘並同東西臺三品秋八月己丑朔日

有蝕之丙辰東臺侍郎李安期出為荊州大督府長史
三年春正月庚寅詔繕工大監蕪瀚海都護劉審禮為
西域道安撫大使壬子以右相劉仁軌為遼東道副大
總管二月戊午遼東道破薛賀水五萬人陣斬首五千
餘級獲生口三萬餘人器械牛馬不可勝計丙寅以明
堂制度歷代不同漢魏以還彌更訛舛遂增古今新制
其圖下詔大赦改元為總章元年二月戊寅幸九成宮
己卯分長安萬年置乾封明堂二縣分理於京城之中

癸未皇太子弘釋奠於國學贈顏回太子少師曾參太子少保夏四月丙辰有彗星見於畢昴之間乙丑上避正殿減膳詔內外羣官各上封事極言過失於是羣臣上言星雖孛而光芒小此非國眚不足上勞聖慮請御正殿復常饌帝曰朕獲奉宗廟撫臨億兆適見于天誠朕之不德也當責躬修德以禳之羣臣復進曰星孛于東北此高麗將滅之徵帝曰高麗百姓即朕之百姓也既為萬國之主豈可推過於小蕃竟不從所請乙亥彗

星滅辛巳西臺侍郎楊武卒秋八月癸酉至自九成宮
九月癸巳司空英國公勣破高麗拔平壤城擒其王高
藏及其大臣男建等以歸境內盡降其城一百七十戶
六十九萬七千以其地為安東都護府分置四十二州
二年春正月封諸王嫡子皆為郡王二月東臺侍郎同
東西臺三品兼知左史事張文瓘署位始入銜三月東
臺侍郎郝處俊同東西臺三品癸酉皇后親祀先蠶夏
四月乙酉幸九成宮置司列少常伯司戎少常伯各兩

員五月庚子移高麗戶二萬八千二百車一千八十乘
牛三千三百頭馬二千九百疋駝六十頭將入內地萊
營二州般次發遣量配於江淮以南及山南并涼以西
諸州空閑處安置六月戊申朔日有蝕之括州大風雨
海水泛溢永嘉安固二縣城郭漂百姓宅六千八百四
十三區溺殺人九千七十牛五百頭損田苗四千一百
五十頃冀州大水漂壞居人廬舍數千家並遣使賑給
秋七月劔南益瀘雋茂陵邛雅緜翼維始簡資榮隆果

梓普遂等一十九州旱百姓乏絕總三十六萬七千六百九十戶遣司珍大夫路勵行存問賑貸癸巳冀州大都督府奏自六月十三日夜降雨至二十日水深五尺其夜暴水深一丈已上壞屋一萬四千三百九十區害田四千四百九十六頃遣右衛大將軍涼國公契苾何力為駕海道行軍大總管秋八月甲戌改瀚海都護府為安北都護府九月己亥發自九成宮壬寅停華林頓大蒐于歧乙巳至歧州高祖初仕隋為扶風太守故曲

赦岐州管内高祖時胥徒隨材擢用賜高年衣物粟帛
各有差冬十月丁巳至自九成宮十一月庚辰發九州
人夫轉發太原倉米粟入京丁亥徙封豫王旭輪為冀
王仍令單名輪十二月戊申司空太子太師英國公勣
薨是冬無雪

三年春正月丁丑右相樂成男劉仁軌致仕辛卯列遼
東地為州縣二月戊申以旱親錄囚徒祈禱名山大川
癸丑日色出如赭三月甲戌朔大赦天下改元為咸亨

元年三月丁丑改蓬萊宮為含元殿壬辰太子少師同
東西臺三品許敬宗致仕夏四月吐蕃寇陷白州等一
十八州又與于闐合衆襲龜茲撥換城陷之罷安西四
鎮辛亥以右威衛大將軍薛仁貴為邏娑道行軍大總
管右衛員外大將軍阿史那道真左衛將軍郭待封為
副領兵五萬以擊吐蕃庚午幸九成宮雍州大雨雹五
月丙戌詔曰諸州縣孔子廟堂及學館有破壞并先來
未造者遂使生徒無肄業之所先師闕奠祭之儀久致

飄露深非敬本宜令所司速事營造六月壬寅朔日有

蝕之秋七月戊子前西臺侍郎李敬玄起復本職仍依舊同東西臺三品薛仁貴郭待封至大非川為吐蕃大將論欽陵所襲大敗仁貴等並坐除名吐谷渾全國盡沒唯慕容諾曷鉢及其親信數千帳內屬仍徙於靈州界八月甲子至自九成宮梁州都督趙王福薨丙寅以久旱避正殿尚食減膳九月甲申衛國夫人楊氏薨贈魯國夫人諡曰忠烈閏月壬子故贈司徒周忠孝公士

護贈太尉太子太師太原郡王贈魯國忠烈太夫人贈
太原王妃甲寅葬太原王妃京官文武九品已上及外
命婦送至便橋宿次冬十月癸酉大雪平地三尺餘行
人凍死者贈帛給棺木令雍同華州貧窶之家有年十
五已下不能存活者聽一切任人收養為男女充驅使
皆不得將為奴婢丙申太子右中護兼攝正諫大夫同
東西臺三品趙仁本為左肅機罷知政事十二月庚寅
諸司及百官各復舊名是歲天下四十餘州旱及霜蟲

百姓飢乏關中尤甚詔令任往諸州逐食仍轉江南租米以賑給之

二年春正月乙巳幸東都留皇太子弘於京監國令侍臣戴至德張文瓘李敬玄等輔之唯以閻立本郝處俊從甲子至東都二月丁亥雍州人梁金柱請出錢三千貫賑濟貧人夏四月戊子大風折木六月戊寅左散騎常侍兼檢校秘書太子賓客周國公武敏之以罪復本姓賀蘭氏除名流雷州丁亥以旱親錄囚徒秋九月地

震司徒潞州刺史徐王元禮薨冬十月搜揚明達禮樂之士十一月甲午朔日有蝕之庚戌幸許汝等州教習癸酉冬狩校獵於許州葉縣昆水之陽十二月丙戌還東都

三年春正月辛丑發梁益等一十八州兵募五千三百人遣右衛副率梁積壽往姚州擊叛蠻辛未制雍洛二州人聽任本州官二月己卯侍中永安郡公姜恪卒於河西鎮守夏四月戊寅幸合璧宮壬午於水南教旗上

問中書令閻立本黃門侍郎郝處俊伊尹負鼎俎于湯
應是補緝時政不知鑄鼎所緣復在何國將為國之重
器歷代傳寶閻立本以古義對五月乙未五品已上改
賜新魚袋並飾以銀三品已上各賜金裝刀子礪石一
具六月丙子於洛州栢崖置倉八月壬子特進高陽郡
公許敬宗卒九月乙卯冀州大都督府復為魏州魏州
復為冀州壬寅沛王賢徙封雍王冬十月己未皇太子
監國壬戌車駕還京師乙亥中書侍郎同中書門下三

品道國公戴至德加兼戶部尚書黃門侍郎同中書門
下三品張文瓘檢校大理卿黃門侍郎甌山縣公同中
書門下三品郝處俊為中書侍郎兼檢校吏部侍郎同
中書門下三品李敬立為吏部侍郎並依舊同中書門
下三品十一月戊子朔日有蝕之甲辰至自東都十二
月癸卯太子左庶子劉仁軌同中書門下三品是冬左
監門大將軍高侃大敗新羅之衆於橫水

四年春正月甲午詔咸亨初收養為男女及驅使者聽

量酬衣食之直放還本處丙辰絳州刺史鄭王元懿薨
二月壬午以左金吾將軍裴居道女為皇太子弘妃夏
四月丙子幸九成宮閏五月丁卯燕山道總管李謹行
破高麗叛黨於瓠盧河之西高麗平壤餘衆遁入新羅
秋七月庚午九成宮太子新宮成上召五品已上諸親
宴太子宮極歡而罷辛巳婺州暴雨水泛溢漂溺居民
六百家詔令賑給八月辛丑上疔疾令太子受諸司啟
事己酉大風毀太廟鸛吻冬十月壬午中書令博陵縣

子閻立本卒乙未皇太子弘納妃畢曲赦岐州大酺三日庚子還京師乙巳至自九成宮十一月丙寅上製樂章有上元二儀三才四時五行六律七政八風九宮十洲得一慶雲之曲詔有司諸大祠享即奏之十二月丙午弓月疎勒二國王入朝請降

五年春正月壬午遣太子左庶子同中書門下三品劉仁軌為雞林道大總管以討新羅仍令衛尉卿李弼右領大將軍李謹行副之三月辛亥朔日有蝕之己巳皇

后祀先蠶夏四月辛卯以尚輦奉御周國公武承嗣為
宗正卿五月己未詔春秋二社本以祈農如聞此外別
為邑會此後除二社外不得聚集有司嚴加禁止六月
壬寅太白入東井秋八月壬辰追尊宣簡公為宣皇帝
懿王為光皇帝太祖武皇帝為高祖神堯皇帝太宗文
皇帝為文武聖皇帝太穆皇后為太穆神皇后文德皇
后為文德聖皇后皇帝稱天皇皇后稱天后改咸亨五
年為上元元年大赦戊戌勅文武官三品已上服紫金

玉帶四品深緋五品淺緋並金帶六品深綠七品淺綠
並銀帶八品深青九品淺青鍮石帶庶人服黃銅鐵帶
一品已下文官並帶手巾算袋刀子礪石武官欲帶亦
聽之九月辛亥百寮具新服上宴之於麟德殿癸丑追
復長孫無忌官爵仍以其曾孫翼襲封趙國公許歸葬
於昭陵先造之墳十一月丙午朔幸東都已酉狩於華
山之曲武原戊辰至東都十二月蔣王憚薨戊子于闐
王伏闍雄來朝辛卯波斯王卑路斯來朝壬寅天后上

意見十二條請王公百寮皆習老子每歲明年一準孝
經論語例試於有司又請子父在為母服三年號王鳳
薨

二年春正月甲寅熒惑犯房壬戌支汗郡王獻碧玻瓈
丙寅以于闐為毘沙都督府以尉遲伏闍雄為毘沙都
督分其境內為十州以伏闍雄有擊吐蕃功故也庚午
龜茲王白素稽獻銀頗羅辛未吐蕃遣其大臣論吐渾
彌來請和不許二月雞林道行軍大總管大破新羅之

衆於七重城斬獲甚衆新羅遣使入朝獻方物伏罪赦之復其王金法敏官爵三月丁未日色如赭丁巳天后親蠶於邙山之陽時帝風疹不能聽朝政事皆決於天后自誅上官儀後上每視朝天后垂簾於御座後政事大小皆預聞之內外稱為二聖帝欲下詔令天后攝國政中書侍郎郝處俊諫止之夏四月分括州永嘉永固二縣置溫州析臨海縣為樂安永寧二縣辛巳周王顯妃趙氏以罪幽死己亥皇太子弘薨于合璧宮之綺雲

殿時帝幸合璧宮是日還東都五月己亥追諡太子弘
為孝敬皇帝六月戊寅以雍王賢為皇太子大赦秋七
月辛亥洛州復置緱氏縣以管孝敬皇帝恭陵慈州刺
史杞王上金坐事於澧州安置八月庚子太子左庶子
同中書門下三品樂成侯劉仁軌為左僕射依舊監修
國史中書門下三品大理卿張文瓘為侍中中書侍郎
同三品甄山公郝處俊為中書令監脩國史如故吏部
侍郎檢校太子左庶子監脩國史李敬玄吏部尚書兼

太子左庶子同中書門下三品依前監脩國史左丞許
圉師為戶部尚書九月丙午宰相劉仁軌戴至德張文
瓘郝處俊並兼太子賓客冬十月析永州營道江華唐
興三縣置道州壬午星孛於角亢之南長五尺十二月
丁亥龜茲王白素稽獻名馬

三年春正月戊戌徙封冀王輪為相王二月甲戌移安
東都護府於遼東乙亥堅昆獻名馬丁亥幸汝州之溫
湯三月癸卯黃門侍郎來恒中書侍郎薛元超並同中

書門下三品甲辰還東都三月己巳朔吐蕃入寇鄯廓
河芳等四州乙酉洛州牧周王顯為洮州道行軍元帥
領工部尚書劉審禮等十二總管并州都督相王輪為
涼州道行軍元帥領左衛將軍契苾何力等軍以討吐
蕃二王竟不行戊午勅制此用白紙多為蟲蠹今後尚
書省下諸司州縣宜並用黃紙其承制勅之司量為卷
軸以備披檢庚寅車駕還京夏四月戊申至自東都甲
寅中書侍郎李義琰同中書門下三品戊午幸九成宮

六月癸丑黃門侍郎高智周同中書門下三品秋七月
彗起東井指北河漸東北長三丈掃中台指文昌宮五
十八日方滅八月乙未吐蕃寇疊州庚子以星變避殿
減膳放京城繫囚令文武官各上封事言得失壬寅置
南選使簡補廣交黔等州官吏青齊等州海泛溢又大
雨漂溺居人五千家遣使賑卹之九月甲子朔車駕還
京丙申郇王素節削戶三分之二於袁州安置癸丑於
北京置金鄰州十一月丁卯勅新造上元舞圓丘方澤

享太廟用之餘祭則停壬申以陳州言鳳凰見於宛丘
改上元三年曰儀鳳元年大赦庚寅吏部尚書李敬立
為中書令十二月丙申皇太子賢上所注後漢書賜物
三萬段戊午遣使分道巡撫宰相來恒河南道薛元超
河北道左丞崔知悌等江南道

二年春正月乙亥上躬籍田於東郊庚辰京師地震壬
辰幸司竹園即日還宮二月丁巳工部尚書高藏授遼
東都督封朝鮮郡王遣歸安東府安輯高麗餘衆司農

卿扶餘隆熊津州都督封帶方郡王令往安輯百濟餘
衆仍移安東都護府於新城以統之夏四月以河南河
北旱遣使賑給八月徙封周王顯為英王改名哲乙巳
太白犯軒轅十二月乙卯勅關內河東諸州召募勇敢
以討吐蕃詔京文武職事官三品已上每年各舉文武
才能堪任將帥牧守者一人是冬無雪

三年四月丁亥朔以旱避正殿親錄囚徒悉原之戊申
大赦改來年正月一日為通乾癸丑涇州獻二小兒連

心異體年四歲五月壬戌幸九成宮以相王輪為洛州
牧秋七月丁巳宴近臣諸親於咸亨殿上謂霍王元軌
曰去冬無雪今春少雨自避暑此宮甘雨頻降夏麥豐
熟秋稼滋榮又得敬立表奏吐蕃入龍支張虔勗與之
戰一日兩陣斬馘極多又太史奏七月朔太陽合虧而
不虧此蓋上天垂祐宗社降靈宣虛薄所能致此又男
輪最小特所留愛比來與選新婦多不稱情近納劉延
景女觀其極有孝行復是私衷一喜思與叔等同為此

歡各宜盡醉上因賦七言詩效栢梁體侍臣並和九月
丁巳還京師辛酉至自九成宮癸亥侍中張文瓘卒丙
寅洮河道行軍大總管中書令李敬玄左衛大將軍劉
審禮等與吐蕃戰于青海之上王師敗績審禮被俘上
以蕃寇為患問計於侍臣中書舍人郭正一等咸以備
邊不深討為上策十月丙午徐州刺史密王元曉薨閏
十月戊寅熒惑犯鉤鈴十一月乙未昏霧四塞連夜不
解丙申雨木冰壬子黃門侍郎同中書門下三品來恒

卒十二月詔停明年通乾之號以反語不善故也

四年正月辛未戶部尚書平恩縣公許圜師卒己酉幸東都庚戌尚書右僕射道國公戴至德薨二月壬戌吐蕃贊普卒遣使弔祭之乙丑東都饑官出糴米以救饑人夏四月戊午熒惑入羽林星左丞崔知悌為戶部尚書中書令郝處俊為侍中五月壬午盜殺正諫大夫明崇儼丙戌皇太子賢監國戊戌造紫桂宮於沔池之西六月辛亥制大赦天下改儀鳳四年為調露元年秋七

月己卯朔詔以今年冬至有事嵩岳禮官學士詳定儀
注八月丁巳侍中郝處俊左庶子高智周黃門侍郎崔
知溫給事中劉景先兼脩國史九月壬午吏部侍郎裴
行儉討西突厥擒其十姓可汗阿史那都支及別帥李
遮旬以歸冬十月單于大都護府突厥阿史德溫傳及
奉職二部相率反叛立阿史那泥熟匐為可汗二十四
州首領並叛遣單于大都護長史蕭嗣業將軍花大智
李景嘉等討之與突厥戰為賊所敗嗣業配流桂州壬

子令將軍曹懷舜率兵往恒州守井陘崔獻往絳州守
龍門以備突厥庚申前詔封嵩山宜停癸亥吐蕃文成
公主遣其大臣論塞調傍來告喪請和親不許遣郎將
來令文使吐蕃會贊普之葬十一月戊寅朔左庶子同
三品高智周罷知政事癸未以吏部侍郎裴行儉為禮
部尚書賞擒都支遮旬之功也甲辰裴行儉為定襄道
大總管與營州都督周道務等兵十八萬并西軍程務
挺東軍李文暉等總三十萬以討突厥甲寅臨軒試應

岳牧舉人

二年春正月乙酉宴諸王諸司三品已上諸州都督刺
史於洛城南門樓奏新造六合還淳之舞二月丙午詔
曰故符璽郎李延壽撰正典一部辭殫雅正雖已淪亡
功猶可錄宜賜其家絹五十疋壬子霍王元軌率文武
百寮請出一月俸料助軍以討突厥癸丑幸汝州溫湯
丁巳至少室山戊午親謁少姨廟賜故玉清觀道士王
遠知諡曰昇真先生贈太中大夫又幸隱士田遊巖所

居己未幸嵩陽觀及啓母廟並命立碑又幸逍遙谷道士潘師正所居甲子自溫湯還東都三月裴行儉大破突厥於黑山擒其首領奉職偽可汗泥熟匐為其部下所殺傳首來降夏四月乙丑幸紫桂宮戊辰黃門侍郎裴炎崔知溫中書侍郎王德真並同中書門下三品五月癸未熒惑犯輿鬼丁酉太白經天秋七月吐蕃寇河源屯于良非川河西鎮撫大使李敬立與吐蕃將贊婆戰于湟中官軍敗績時左武衛將軍黑齒常之力戰大

破蕃軍遂擢為河源軍經畧大使令李敬玄鎮鄯州為之援丙申江王元祥薨是月突厥餘衆圍雲州中郎將程務挺擊破之八月丁未自紫桂宮還東都丁巳鄯州都督李敬玄左遷衡州刺史甲子廢皇太子賢為庶人幽於別所乙丑立英王哲為皇太子改調露二年為永隆元年赦天下大酺三日太子左庶子同中書門下三品張大安坐庶人左遷普州刺史九月河南河北諸州大水遣使賑卹溺死者官給棺槨其家賜物七段冬十

月壬寅蘇州刺史曹王明降封零陵郡王於黔州安置坐
附庶人賢也已酉自東都還京十一月朔日有蝕之洛
州饑減價官糴以救饑人

二年春正月突厥寇原慶等州乙亥命將軍李知十王
果等分兵禦之癸巳遣禮部尚書裴行儉為定襄道大
總管率師討突厥溫傳部落己亥詔雍岐華同民戶宜
免兩年地稅河南河北遭水處一年上詔雍州長史李
義立曰朕思還淳返朴示天下以質素如聞游手墮業

此類極多時稍不豐便致饑饉其異色綾錦并花間裙
衣等糜費既廣俱害女工天后我之匹敵常著七破間
裙豈不知更有靡麗服飾務遵節儉也其紫服赤衣閭
閻公然服用兼商賈富人厚葬越禮卿可嚴加捉搦勿
使更然二月丙午皇太子親行釋奠禮三月辛卯左僕
射同三品劉仁軌兼太子少傅侍中郝處俊為太子少
保罷知政事五月丙戌定襄道總管曹懷舜與突厥史
伏念戰於橫水官軍大敗懷舜減死配流嶺南六月壬

子故江王元祥男暉以犯名教斬於大理寺後園七月

太平公主出降薛紹赦京城繫囚閏七月丁未黃門侍

郎裴炎為侍中黃門侍郎崔知溫中書侍郎薛元超並

為中書令庚申上以服餌令皇太子監國丙寅雍州大

風害稼米價騰踊是月裴行儉大破突厥史伏念之衆

伏念為程務挺急追遂執溫傳來降行儉於是盡平突

厥餘黨行儉執伏念溫傳振旅凱旋八月丁卯朔河南

河北大水許遭水處往江淮已南就食丁亥戶部尚書

崔知溫卒辛卯改交州為安南都護府九月丙申彗星
見於天市長五尺冬十月丙寅朔日有蝕之乙丑改永
隆二年為開耀元年曲赦定襄軍及緣征突厥官吏兵
募等丙寅斬阿史那伏念及溫傳等五十四人於都市
丁亥新羅王金法敏薨仍以其子政襲位十一月癸卯
徙庶人賢于巴州十二月吐火羅獻金衣一領上不受
辛未太子少保甌山縣公郝處俊薨

永淳元年正月乙未朔以年饑罷朝會關內諸府兵令

於鄧綏等州就穀二月癸未以太子誕皇孫滿月大赦
改開耀二年為永淳元年大酺三日戊午立皇孫重照
為皇太孫欲開府置寮屬吏部郎中王方慶曰按周禮
有嫡子無嫡孫漢魏已來皇太子在不立太孫但封王
耳晉立愍懷太子子或為太孫齊立文惠太子子昭業
為太孫便居東宮而皇太子在而立太孫未有前例上
曰自我作古可乎亦可然竟不立府寮是春闕內旱日
色如赭四月甲子朔日有蝕之丙寅幸東都皇太子京

師留守命劉仁軌裴炎薛元超等輔之上以穀貴減扈
從兵士庶從者多殍踣於路辛未以裴行儉為金牙道
行軍大總管與將軍閻懷旦等三總管兵分道討十姓
突厥阿史那車薄行儉未行而卒安西副都護王方翼
破車薄咽麴西域平戊寅次澠池之紫桂宮乙酉至東
都丁亥黃門侍郎郭待舉兵部侍郎岑長倩中書侍郎
郭正一吏部侍郎魏玄同並同中書門下同承受進止
平章事上謂叅知政事崔知溫曰待舉等厯任尚淺且

令預聞政事未可即與卿等同名稱自是外司四品已
下知政事者遂以平章為名五月壬寅置東都苑總監
自丙午連日澍雨洛水溢壞天津及中橋立德弘教景
行諸坊溺居民千餘家六月關中初雨麥苗澇損後旱
京兆岐隴螟蝗食苗並盡加以民多疫癘死者枕藉於
路詔所在官司埋瘞丁丑以岐州刺史蘇良嗣為雍州
長史京師人相食寇盜縱橫秋七月己亥造奉天宮於
嵩山之陽仍置嵩陽縣又於藍田造萬全宮庚申零陵

王明薨是秋山東大水民饑吐蕃寇柘松翼等州冬十月甲子京師地震丙寅黃門侍郎劉景先同平章事十二月南天竺于闐各獻方物突厥餘黨阿史那骨篤祿等招合殘衆據黑沙城入寇并州北境

二年春正月甲午朔幸奉天宮遣使祭嵩岳少室箕山具茨等山西王母啓母巢父許由等祠二月甲午洛州長史李仲立為宗正卿庚午突厥寇定州媯州之境己卯左領軍衛大將軍薛仁貴卒三月庚寅突厥阿史那

骨篤祿阿史德元珍等圍單于都護府丙午慧見五車
北二十五日而滅癸丑中書令崔知溫卒夏四月己巳
還東都甲申綏州部白鐵余據城平縣反命將軍程務
挺將兵討之五月庚寅幸芳桂宮阻雨還東都突厥寇
蔚州殺刺史李思儉豐州都督崔智辨率師出朝那山
掩擊之為賊所敗遂寇嵐州秋七月己丑封皇孫重福
為唐昌郡王甲辰相王輪改封豫王仍名旦己丑令唐
昌郡王重福為京留守劉仁軌副之召皇太子至東都

己巳河水溢壞河陽城水面高於城內五尺北至鹽坎
居人廬舍漂沒皆盡南北並壞庚戌熒惑入輿鬼犯質
星十一月皇太子來朝癸亥幸奉天宮時天后自封岱
之後勸上封中岳每下詔草儀注即歲饑邊事緊急而
止至是復行封中岳禮上疾而止上苦頭重不可忍侍
醫秦鳴鶴曰刺頭微出血可愈天后帷中言曰此可斬
欲刺血於人主首耶上曰吾苦頭重出血未必不佳即
刺百會上曰吾眼明矣戊戌命將軍程務挺為單于道

安撫大使以招討總管材山賊元珍骨篤祿賀魯等詔
皇太子監國裴炎劉齊賢郭正一等於東宮同平章事
丁未自奉天宮還東都上疾甚宰臣已下並不得謁見
十二月己酉詔改永淳二年為弘道元年將宣赦書上
欲親御則天門樓氣逆不能上馬遂召百姓於殿前宣
之禮畢上問侍臣曰民庶喜否曰百姓蒙赦無不感悅
上曰蒼生雖喜我命危篤天地神祇若延吾一兩月之
命得還長安死亦無恨是夕帝崩於真觀殿時年五十

六宣遺詔七日而殯皇太子即位于柩前園陵制度務從節儉軍國大事有不決者取天后處分羣臣上諡曰天皇大帝廟號高宗文明元年八月庚寅葬於乾陵天寶十三載改諡曰天皇大弘孝皇帝

史臣曰大帝往在藩儲見稱長者暨昇旒宸頓異明哉虛襟似納於觸鱗下詔無殊於扇暍既蕩情於帷薄遂忽怠於基局惑麥斛之佞言中宮被毒聽趙師之誣說元舅銜冤忠良自是脅肩竢倂於焉得志卒致盤維盡

戮宗社為墟古所謂一國為一人興前賢為後愚廢信
矣哉

贊曰藉文鴻業僅保餘位封岱禮天其德不類伏戎于
寢構堂終墜自蘊禍胎邦家殄瘁

舊唐書卷五

舊唐書卷五考證

高宗本紀卷下二月戊寅幸九成宮○上已書二月矣
此二月衍文

二月癸未皇太子弘釋奠于國學○新書在四月乙卯
据禮志又在三月

總章二年六月戊申朔日有蝕之括州大風雨海水泛
溢○新書在九月庚寅綱目亦在九月

三月丁丑改蓬萊宮為含元殿○上已書三月矣此三

月衍文

咸亨三年冬十月己未皇太子監國。○沈炳震曰二年正月幸東都詔皇太子弘監國是月壬戌始還京師是二年至此月皆皇太子監國不必復書監國也疑屬衍文

上元二年夏四月己亥皇太子弘薨于合璧宮之綺雲

殿。○臣德潛

按新書書天后殺皇太子蓋顯言之此

則隱其惡也

永淳元年二月上曰自我作古可乎亦可然竟不立府

寮○

臣宗萬

按通鑑高宗欲為太孫置官屬王方慶

以為不可上曰自我作古可乎方慶對曰三王不相襲禮何為不可據此則亦可亦字當是曰字方於下文相接

二年七月相王輪改封豫王仍名旦○

臣德潛

按相王

至此始名旦不得云仍名也當依通鑑更名旦為是

舊唐書卷五考證

欽定四庫全書薈要卷四千九百十八

史部

舊唐書卷六

後晉司空同中書門下平章事劉 昫撰

本紀第六

則天皇后

則天皇后武氏諱曌并州文水人也父士彥隋大業末為鷹揚府隊正高祖行軍於汾晉每休止其家義旗初起從平京城貞觀中累遷工部尚書荊州都督封應國

公初則天年十四時太宗聞其美容止召入宮立為才人及太宗崩遂為尼居感業寺大帝於寺見之復召入宮拜昭儀時皇后王氏良娣蕭氏頻與武昭儀爭寵互讒毀之帝皆不納進號宸妃永徽六年廢王皇后而立武宸妃為皇后高宗稱天皇武后亦稱天后后素多智計兼涉文史帝自顯慶已後多苦風疾百司表奏皆委天后詳決自此內輔國政數十年威勢與帝無異當時稱為二聖弘道元年十二月丁巳大帝崩皇太子顯即

位尊天后為皇太后既將篡奪是日自臨朝稱制庚午
加授澤州刺史韓王元嘉為太尉豫州刺史滕王元嬰
為開府儀同三司絳州刺史魯王靈夔為太子太師相
州刺史越王貞為太子太傅安州都督紀王慎為太子
太保元嘉等地尊望重恐其生變故進加虛位以安其
心甲戌劉仁軌為尚書左僕射岑長倩為兵部尚書魏
元同為黃門侍郎並依舊知政事劉齊賢為侍中裴炎
為中書令

嗣聖元年春正月甲申朔改元二月戊午廢皇帝為廬陵王幽于別所仍改賜名哲己未立豫王輪為皇帝令居於別殿大赦天下改元文明皇太后仍臨朝稱制庚午廢皇太孫重照為庶人太常卿兼豫州府長史王德貞為侍中中書侍郎豫王府司馬劉禕之同中書門下三品三月庶人賢死于巴州夏四月滕王元嬰薨改封畢王上金為澤王葛王素節為許王丁丑遷廬陵王哲於均州閏五月禮部尚書武承嗣同中書門下三品秋

七月突厥骨咄祿元珍寇朔州命左威衛大將軍程務
挺拒之彗星見西北方長二丈餘經三十日乃滅九
月大赦天下改元為光宅旗幟改從金色飾以紫畫以
雜文改東都為神都又改尚書省及諸司官名初置右
肅政御史臺官員故司空李勣孫柳州司馬徐敬業偽
稱揚州司馬殺長史陳敬之據揚州起兵自稱上將以
匡復為辭冬十月楚州司馬李崇福率所部三縣以應
敬業命左玉鈴衛大將軍李孝逸為大總管率兵三十

萬以討之殺內史裴炎丁酉追削敬業父祖官爵復其
本姓徐氏十二月前中書令薛元超卒殺左威衛大將
軍程務挺

垂拱元年春正月以敬業平大赦天下改元劉仁軌薨
三月遷廬陵王哲於房州頒下親撰垂拱格於天下夏
四月內史竊味道左授青州刺史五月秋官尚書裴居
道為內史納言王德真配流象州冬官尚書蘇良嗣為
納言詔内外文武九品已上及百姓咸令自舉是夏大

旱

二年春正月皇太后下詔復政於皇帝帝以皇太后非實意乃固讓皇太后仍依舊臨朝稱制大赦天下初令都督刺史並準京官帶魚三月初置匭於朝堂有進書言事者聽授之由是人間善惡事多所知悉夏四月岑長倩為內史六月蘇良嗣為文昌左相天官尚書韋待價為文昌右相並同鳳閣鸞臺三品右肅政御史大夫韋思謙為納言

三年春正月封王子成義為恒王隆基為楚王隆範為衛王隆業為趙王二月韋思謙請致仕許之夏四月裴居道為納言夏官侍郎張光輔為鳳閣侍郎同鳳閣鸞臺平章事庚午劉禕之賜死於家秋八月地官尚書魏玄同檢校納言

四年春二月毀乾元殿就其地造明堂山東河南甚饑之詔司屬卿王及善司府卿歐陽通冬官侍郎狄仁傑巡撫賑給夏四月魏王武承嗣偽造瑞石文云聖母臨

人永昌帝業令雍州人唐同泰表稱獲之洛水皇太后
大悅號其石為寶圖擢授同泰游擊將軍五月皇太后
加尊號曰聖母神皇秋七月大赦天下改寶圖曰天授
聖圖封洛水神為顯聖加位特進并立廟就水側置永
昌縣天下大酺五日八月壬寅博州刺史琅邪王冲據
博州起兵命左金吾大將軍丘神勣為行軍總管討之
庚戌冲父豫州刺史越王貞又舉兵於豫州與冲相應
九月命內史岑長倩鳳閣侍郎張光輔左監門大將軍

鞠崇裕率兵討之丙寅斬貞及冲等傳首神都改姓為
虺氏曲赦博州韓王元嘉魯王靈夔元嘉子黃國公譔
靈夔子左散騎常侍范陽王藹霍王元軌及子江都王
緒故虢王元鳳子東莞公融坐與貞通謀元嘉靈夔自
殺元軌配流黔州譔等伏誅改姓虺氏自是宗室諸王
相繼誅死者殆將盡矣其子孫年幼者咸配流嶺外誅
其親黨數百餘家十二月神皇拜洛水受天授聖圖是
日還宮明堂成

永昌元年春正月神皇親享明堂大赦天下改元大酺
七日三月張光輔為內史武承嗣為納言夏四月誅蔣
王憚道王元慶徐王元禮曹王明等諸子孫徙其家屬
於雋州五月命文昌右相韋待價為安息道大總管以
討吐蕃六月令文武官五品已上各舉所知秋七月紀
王慎被誣告謀反載以檻車流于巴州改姓虺氏韋待
價坐遲留不進士卒多飢饉而死配流繡州八月左肅
政御史大夫王本立同鳳閣鸞臺三品辛巳誅內史張

光輔九月納言魏玄同賜死于家冬十月春官尚書范履冰鳳閣侍郎邢文偉同鳳閣鸞臺平章事改羽林軍百騎為千騎

載初元年春正月神皇親享明堂大赦天下依周制建子月為正月改永昌元年十一月為載初元年十二月為臘月改舊正月為一月大酺三日神皇自以璽字為名遂改詔書為制書春一月蘇良嗣為特進武承嗣為文昌左相岑長倩為文昌右相裴居道為太子少傅並

依舊同鳳閣鸞臺三品鳳閣侍郎武攸寧為納言邢文

偉為內史秋七月殺豫章王亶遷其父舒王元名於和

州有沙門十人偽撰大雲經表上之盛言神皇受命之

事制頒於天下令諸州各置大雲寺總度僧千人丁亥

殺隨州刺史澤王上金舒州刺史許王素節并其子數

十人九月九日壬午革唐命改國號為周改元為天授

大赦天下賜酺七日乙酉加尊號曰聖神皇帝降皇帝

為皇嗣丙戌初立武氏七廟於神都追尊神皇父贈太

尉太原王士護為孝明皇帝兄子文昌左相承嗣為魏
王天官尚書三思為梁王堂姪懿宗等十二人為郡王
司賓卿史務滋為納言鳳閣侍郎宗秦客為內史給事
中傅游藝為鸞臺侍郎仍依舊知鳳閣鸞臺平章事令
史務滋等十人分道存撫天下改內外官所佩魚並作
龜冬十月改并州文水縣為武興縣依漢豐沛例百姓
子孫相承給復

二年正月親祀明堂春三月改唐太廟為享德廟夏四

月令釋教在道法之上僧尼處道士女冠之前六月命

岑長倩率諸軍討吐蕃左肅政御史大夫格輔元為地

官尚書鸞臺侍郎樂思晦並同鳳閣鸞臺平章事秋七

月徙關內雍同等七州戶數十萬以實洛陽分京兆置

鼎稷鴻宜四州夏官尚書歐陽通納言事九月傅游

藝下獄死右羽林衛大將軍建昌王攸寧為納言洛州

司馬狄仁傑為地官侍郎同鳳閣鸞臺平章事冬十月

制官人者咸令自舉殺文昌左相岑長倩納言歐陽通

地官尚書格輔元

三年正月親祀明堂春一月冬官尚書楊執柔同鳳閣
鸞臺平章事三月五天竺國並遣使朝貢四月大赦天
下改元為如意禁斷天下屠殺秋七月大雨洛水汎溢
漂流居人五千餘家遣使巡問賑貸八月魏王承嗣為
特進建昌王攸寧為冬官尚書楊執柔為地官尚書並
罷知政事秋官侍郎崔元琮為鸞臺侍郎夏官侍郎李
昭德為鳳閣侍郎檢校天官侍郎姚璿為文昌左丞地

官侍郎李元素為文昌右丞並同鳳閣鸞臺平章事九月大赦天下改元為長壽改用九月為社大酺七日并州改置北都冬十月武威軍總管王孝傑大破吐蕃復龜茲于闐疎勒碎葉鎮

二年春一月親享明堂癸亥殺皇嗣妃劉氏竇氏臘月改封皇孫成器為壽春郡王宜王成義為衡陽郡王隆基為臨淄郡王衛王隆範為巴陵郡王隆業為彭城郡王春二月尚方監裴匪躬坐潛謁皇嗣腰斬於都市秋

九月上加金輪聖神皇帝號大赦天下大酺七日辛丑
司賓卿豆盧欽望為內史文昌右丞韋巨源同鳳閣鸞
臺平章事秋官侍郎陸元方為鸞臺侍郎同鳳閣鸞臺
平章事

三年春一月親享明堂三月鳳閣侍郎李昭德檢校內
史鸞臺侍郎蘇味道同鳳閣鸞臺平章事韋巨源為夏
官侍郎依舊知政事四月夏官尚書王孝傑同鳳閣鸞
臺三品五月上加尊號為越古金輪聖神皇帝大赦天

下改元為延載大酺七日秋八月司賓少卿姚璦為納
言左肅政御史中丞楊再思為鸞臺侍郎洛川司馬杜
景儉為鳳閣侍郎仍並同鳳閣鸞臺平章事梁王武三
思勸率諸蕃酋長奏請大徵斂東都銅鐵造天樞於端
門之外立頌以紀上之功業九月內史李昭德左授欽
州南賓縣尉冬十月文昌右丞李元素為鳳閣鸞臺平
章事

證聖元年春一月上加尊號曰慈氏越古金輪聖神皇

帝大赦天下改元大酺七日戊子豆盧欽望韋巨源杜
景儉蘇味道陸元方並左授趙卨集綏等州刺史丙申
夜明堂災至明而並從煨燼庚子以明堂災告廟手詔
責躬令内外文武九品已上各上封事極言正諫春二
月上去慈氏越古尊號秋九月親祀南郊加尊號天冊
金輪聖神皇帝大赦天下改元為天冊萬歲大辟罪已
下及犯十惡常赦所不原者咸赦除之大酺九日

萬歲登封元年臘月甲申上登封于嵩嶽大赦天下改

元大酺九日丁亥禪于少室山己丑又制内外官三品
已上通前賜爵二等四品已下加兩階洛州百姓給復
二年登封告成縣三年癸巳至自嵩嶽甲午親謁太廟
春三月重造明堂成夏四月親享明堂大赦天下改元
為萬歲通天大酺七日以天下大旱命文武官九品以
上極言時政得失五月營州城傍契丹首領松漠都督
李盡忠與其妻兄媯誠州刺史孫萬榮殺都督趙文翹
舉兵反攻陷營州盡忠自號可汗乙丑命鷹揚將軍曹

仁師右金吾大將張玄遇右武威大將軍李多祚司農少卿麻仁節等二十八將討之秋七月命春官尚書梁王三思為安撫大使納言姚璦為之副制改李盡忠為盡滅孫萬榮為萬斬秋八月張玄遇曹仁師麻仁節與李盡滅戰于西硤石黃麋谷官軍敗績玄遇仁節並為賊所虜九月命右武衛大將軍建安王攸宜為大總管以討契丹并州長史王方慶為鳳閣侍郎與殿中監李道廣並同鳳閣鸞臺平章事吐蕃寇涼州都督許欽明

為賊所執庚申王方慶為鳳閣侍郎仍依舊知政事李
盡滅死其黨孫萬斬代領其衆冬十月孫萬斬攻陷冀
州刺史陸寶積死之十一月又陷瀛州屬縣

二年正月親享明堂鳳閣侍郎李元素夏官侍郎孫元
亨坐與綦連耀謀反伏誅原州都督府司馬婁師德為
鳳閣侍郎同鳳閣鸞臺平章事春二月王孝傑蘇宏暉
等率兵十八萬與孫萬戰于硤石谷王師敗績孝傑
沒於陣宏暉棄甲而遁夏四月鑄九鼎成置于明堂之

庭前益州大都督府長史王及善為內史五月命右金
吾大將軍河內王懿宗為大總管右肅政御史大夫婁
師德為副大總管右武威衛大將軍沙吒忠義為前軍
總管率兵二十萬以討孫萬斬六月內史李昭德司業
少卿來俊臣以罪伏誅孫萬斬為其家奴所殺餘黨大
潰魏王承嗣梁王三思並同鳳閣鸞臺三品秋八月納
言姚璿為益州大都督府長史九月以契丹李盡滅等
平大赦天下改元為神功大酺七日婁師德為納言冬

十月前幽州都督狄仁傑為鸞臺侍郎司刑卿杜景儉為鳳閣侍郎並同鳳閣鸞臺平章事

聖歷元年正月親享明堂大赦天下改元大酺九日春三月召廬陵王哲於房州夏五月禁天下屠殺突厥默啜上言有女請和親秋七月令淮陽王武延秀往突厥納默啜女為妃遣右豹韜衛大將軍閻知微攝春官尚書赴虜庭八月突厥默啜以延秀非唐室諸王乃囚於別所率衆與閻知微入寇媯檀等州命司屬卿高平王

重規右武威衛大將軍沙吒忠義幽州都督張仁亶右

羽林衛大將軍李多祚等率兵二十萬逆擊乃放延秀

還己丑默啜攻陷定州刺史孫彥高死之焚燒百姓廬

舍遇害者數千人魏王承嗣卒庚子梁王三思為內史

狄仁傑為納言九月建昌王攸寧同鳳閣鸞臺平章事

默啜攻陷趙州刺史高釁遇害丙子廬陵王哲為皇太

子令依舊名顯大赦天下大酺五日令納言狄仁傑為

河北道行軍元帥辛巳皇太子謁太廟天官侍郎蘇味

道鳳閣侍郎同鳳閣鸞臺平章事癸未默啜盡殺所掠
趙定州男女萬餘人從五迴道而去所至殘害不可勝
紀冬十月夏官侍郎姚元宗麟臺少監李嶠並同鳳閣
鸞臺平章事是月閻知微自突厥叛歸族誅之

二年春二月封皇嗣旦為相王初為寵臣張易之及其
弟昌宗置控鶴府官員尋改為奉宸府班在御史大夫
下左肅政御史中丞魏元忠為鳳閣侍郎吉頊為天官
侍郎並同鳳閣鸞臺平章事戊子幸嵩山過王子晉廟

丙申幸緱山丁酉至自嵩山夏四月吐蕃大論贊婆來
奔秋七月上以春秋高慮皇太子相王與梁王武三思
定王武攸寧等不協令立誓文於明堂八月王及善為
文昌左相豆盧欽望為文昌右相仍並同鳳閣鸞臺三
品冬十月乙亥幸福昌縣王及善薨

三年正月戊寅梁王三思為特進天官侍郎吉頊配流
嶺表臘月辛巳封皇太子男重潤為召王狄仁傑為內
史戊寅幸汝州之溫湯甲戌至自溫湯造三陽宮于嵩

山春三月李嶠為鸞臺侍郎知政事如故夏四月戊申
幸三陽宮五月癸丑上以所疾康復大赦天下改元為
久視停金輪等尊號大酺五日六月魏元忠為左肅政
御史大夫仍舊知政事是夏大旱秋七月至自三陽宮
天官侍郎張錫為鳳閣侍郎同鳳閣鸞臺平章事其甥
鳳閣鸞臺平章事李嶠為成均祭酒罷知政事壬寅制
曰隋尚書令楊素昔在本朝早荷殊遇稟凶邪之德有
諂佞之才惑亂君上離間骨肉搖動冢嫡寧唯握蠱之

禍誘扇後主卒成請蹕之釁隋室喪亡蓋惟多僻究其
萌兆職此之由生為不忠之人死為不義之鬼身雖幸
免子竟族誅斯則姦逆之謀是為庭訓險薄之行遂成
門風刑戮雖加枝裔仍在何得肩隨近侍齒列朝行朕
接統百王恭臨四海上嘉賢佐下惡賊臣常欲從容於
萬機之餘褒貶於千載之外況年代未遠耳目所存者
乎其楊素及兄弟子孫已下並不得令任京官及侍衛
九月內史狄仁傑卒冬十月甲寅復舊正朔改一月為

正月仍以為歲首正月依舊為十一月大赦天下韋巨源為地官尚書文昌左丞韋安石為鸞臺侍郎同鳳閣鸞臺平章事丁卯幸新安曲赦其縣壬申至自新安十二月開屠禁諸祠祭令依舊用牲牢

大足元年春正月制改元二月鸞臺侍郎李懷遠同鳳閣鸞臺平章事三月姚元崇為鳳閣侍郎依舊知政事丙申鳳閣侍郎張錫坐贓配循州夏五月幸三陽宮命左肅政御史大夫魏元忠為總管以備突厥天官侍郎

顧琮同鳳閣鸞臺平章事六月夏官侍郎李迥秀同鳳閣鸞臺平章事辛未曲赦告城縣秋七月甲戌至自三陽宮九月召王重潤為易之讒構令自死冬十月幸京師大赦天下改元為長安

二年春正月突厥寇鹽夏等州殺掠人吏秋九月乙丑日有蝕之不盡如鉤京師及四方見之冬十月日本國遣使貢方物十一月相王旦為司徒戊子親祀南郊大赦天下

三年春三月壬戌日有蝕之夏四月庚子相王旦表讓

司徒許之改文昌臺為中臺李嶠知納言事六月寧州
雨山水暴漲漂流二千餘家溺死者千餘人秋七月殺
右金吾大將軍唐休景秋九月正諫大夫朱敬則同鳳閣
鸞臺平章事戊申相王旦為雍州牧是月御史大夫兼
知政事太子右庶子魏元忠為張昌宗所譖左授端州
高要尉京師大雨雹人畜有凍死者冬十月丙寅駕還
神都乙酉至自京師

四年春正月造興泰宮於壽安縣之萬安山天官侍郎
韋嗣立為鳳閣侍郎同鳳閣鸞臺平章事朱敬則請致
仕許之三月進封平恩郡王重福為譙王夏官侍郎宗
楚客同鳳閣鸞臺平章事夏四月韋安石知納言事李
嶠知內史事丙子幸興泰宮六月天官侍郎崔玄暉同
鳳閣鸞臺平章事李嶠為國子祭酒知政事如故七月
丙戌楊再思為內史甲午至自興泰宮宗楚客左授原
州都督八月姚元崇為司僕卿知政事韋安石檢校揚

州大都督府長史冬十月秋官侍郎張柬之同鳳閣鸞臺平章事十一月李嶠為地官尚書張柬之為鳳閣鸞臺平章事自九月至於是日夜陰晦大雨雪都中人有飢凍死者令官司開倉賑給

神龍元年春正月大赦改元上不豫制自文明元年已後得罪人除揚豫博三州及諸逆魁首咸赦除之癸亥麟臺監張易之與弟司僕卿昌宗反皇太子率左右羽林軍桓彥範敬暉等以羽林兵入禁中誅之甲辰皇太

子監國總統萬機大赦天下是日上傳皇帝位于皇太子徙居上陽宮戊申皇帝上尊號曰則天大聖皇帝冬十一月壬寅則天將大漸遺制祔廟歸陵令去帝稱則天大聖皇后其王蕭二家及褚遂良韓瑗等子孫親屬當時緣累者咸令復業是日崩于上陽宮之仙居殿年八十三諡曰則天大聖皇后二年五月庚申祔葬于乾陵睿宗即位詔依上元年故事號為天后未幾追尊為大聖天后改號為則天皇后太后太后嘗召文學之士周

思茂范履冰衛敬業令撰立覽及古今內範各百卷青
宮紀要少陽政範各三十卷維城典訓鳳樓新誠孝子
列女傳各二十卷內軌要略樂書要錄各十卷百寮新
誠兆人本業各五卷臣範兩卷垂拱格四卷并文集一
百二十卷藏于秘閣

史臣曰治亂時也存亡勢也使桀紂在上雖十堯不能
治使堯舜在上雖十桀不能亂使懦夫女子乘時得勢
亦足坐制羣生之命肆行不義之威觀夫武氏稱制之

年英才接軫靡不痛心於家索扼腕於朝危竟不能報
先帝之恩衛吾君之子俄至無辜被陷引頸就誅天地
為籠去將安所悲夫昔掩鼻之讒古稱其毒人彘之酷
世以為寬武后奪嫡之謀也振喉絕襁褓之兒菹醢碎
椒塗之骨其不道也甚矣亦姦人妬婦之恒態也然猶
汎延讜議時禮正人初雖牝雞司晨終能復子明辟飛
語辯元忠之罪善言慰仁傑之心尊時憲而抑幸臣聽
忠言而誅酷吏有旨哉有旨哉

贊曰龍鰲易貌丙殿昌儲胡為穹昊生此夔魑
寇鼓神器穢褻皇居窮妖白首降鑒何如

舊唐書卷六

舊唐書卷六考證

則天皇后本紀嗣聖元年二月己未立豫王輪為皇帝
○沈炳震曰前既改名旦矣不應仍書豫王輪新書
稱旦為合

天授二年改唐太廟為享德廟○新書在元年十月
長壽三年梁王武三思勸率諸蕃酋長奏請大徵斂東
都銅鐵造天樞于端門之外○新書在證聖元年四
月綱目亦同新書

萬歲登封元年○

臣德潛

按原本誤連于證聖元年之

後是合二年為一年也今已更正

洛州百姓給復二年○

臣德潛

按此因登封嵩嶽大赦

天下而尤加恩于洛州百姓也原本誤認為元年後
之二年另行提起是分一年為二年矣今已更正

二年六月內史李昭德司業少卿來俊臣以罪伏誅○

臣德潛

按當時昭德俊臣同棄市時人無不痛昭德

而快俊臣俊臣應書伏誅昭德非其倫也新書云殺

監察御史李昭德綱目云周來俊臣伏誅得其旨矣
聖歷二年春二月封皇嗣旦為相王○新書在正月壬
戌綱目在元年十一月互異

夏四月吐蕃大論贊婆來奔○新書在十月丁亥

長安三年秋七月殺右金吾大將軍唐休璟○新書秋
七月庚戌檢校涼州都督唐休璟為夏官尚書同鳳

閣鸞臺平章事

臣德潛

按本傳休璟未嘗被殺且未

嘗為金吾大將軍此于殺金吾大將軍下明有關文

且并闕休璟之遷官而以兩事混而一之也

神龍元年十一月崩于上陽宮之仙居殿年八十三○

新書后妃傳年八十一綱目亦同新書

舊唐書卷六考證

謹案卷五第一頁後四行四品以下七品以上加階以上下文義推之加階當作加二階

第十一頁後三行武官欲帶亦聽之刊本武官訛文武今改

第十九頁後七行坐庶人案文義當作坐附庶人賢此脫附字賢字



總校官庶吉士臣侍朝

校對官中書臣張塤

膳錄監生臣鄧肇槐